

南斗延壽燈儀

法事如式

具位某誠惶誠恐稽首頓首焚香再拜上奏
三清上聖十極高真中天星主紫微大帝日
官太陽帝君月府太陰皇君五星四曜星君
南斗六司延壽星君北斗九皇延生星君東
西中斗星君二十八宿星君普天宿度羣真
本命元辰星君三元三官大帝北極四聖真
君五師三省真君三界四府無鞅聖眾燈壇
會上萬聖千真恭望聖慈洞回昭鑒

臣聞天地之德莫大於生洪範之疇莫全於
福爰有主司之職可伸禳祝之心仰惟三境
之中南斗為長生之府六司之內真君持掌
握之權凡彼流形歸於所宰是以按河圖之
品格披靈寶之科儀嚴設星燈恭陳醮禮宜
通上境延降高真令弟子某心假香傳誠惟
物顯仰瞻南極上法斗司然寶炬之光明以
昭垂像誦真科而吟詠庶獲來臨伏願天鑒
不違神心善應瓊瑛羽蓋咫尺威靈金馬瑞
車森羅空際延生定命克臻瑞氣之來燭幽

察微丕示照臨之德恭持法信上贊神明稽
首皈依虔誠讚詠

臣眾等志心皈命明德宮大聖南斗天府
司命上相鎮國真君諸靈官

臣聞天賦羣靈均有自然之命人懷大本咸
歸皇極之中養之者福謝尤生敗之者禍因
自起永惟宰制實在司存倘有所穰宜修誠
懇今辰某洗心滌慮養氣存神風懷慕道之
心仰畏在天之像謹依科式建立星壇備香
花燈燭之儀歸命明德宮大聖南斗天府司
命上相鎮國真君伏願天誘其衷咸迪綿長
之道物蒙其澤悉無短折之凶稽首歸依如
儀讚詠

南斗司命上相高真包羅萬象鎮國威靈
為天之府左右帝臣羣仙受令萬氣來生
金闕上宰玉清尊神玄元妙道敢有不遵
萬神安鎮衛護帝庭

臣眾等志心皈命洞文宮大聖南斗天相
司錄上相鎮嶽真君諸靈官
臣聞太極之初道無常體我生之後物有定

名災祥在德而貴賤因差吉凶在人而賢愚
靡間春茲主者付之自然倘施丹懇之誠必
獲洪休之報今辰某專心正意向道修具仰
惟成象之著明虔仗上天之助順謹依科式
建立星壇備香花燈燭之儀歸命洞文宮大
聖南斗司錄上相鎮嶽真君伏願恢弘上道
默收糾察之威普濟羣生式序修為之善稽
首歸依虔誠讚詠

南斗司錄天相尊神定生注祿保命延生
嶽神受命總監眾靈赫然妙道蕩滌妖氛
蠲除惡障保衛身形羣仙歸仰眾妙咸明
造化自然飛昇上清

臣眾等志心皈命柔德宮大聖南斗天梁
延壽保命真君諸靈官

臣聞長生久視乃大道之體常祝壽延主實
庶民之所欲在天則常存而不易在人則命
遠而不傷欲其壽延莫先所禱將叩靈司之
祝宜修庶物之誠今某專意致明仰天觀象
冀神真之降鑒析書考之增崇謹依科式建
立星壇備香花燈燭之儀歸命柔德宮大聖

南斗天梁延壽保命真君伏願誕佈至仁咸
迪綿長之慶銷張生德永無天闕之虞稽首
歸依虔誠讚詠

南斗延壽為天之梁普度萬類咸其浸昌
壽考惟祺億載無疆永保天命以除不祥
生生不滅如陵如阿仁愛普施箕翼重光
與神合德亘古綿長

臣眾等志心皈命保光官大聖南斗天同
益算保生真君諸靈官

臣聞數分而多寡殊多則為美命降而長短
辨長乃其祥惟方寸之不欺庶年齡之可益
上真所掌精意是求今某欲增耆艾之年欽
若昭回之像交於恍惚應以形聲謹依科式
建立星壇備香花燈燭之儀歸命保光官大
聖南斗天同益算保生真君伏願大慈下際
長如春日之生遐算巨增盛若高山之固稽
首歸依虔誠讚詠

洞清上境命駕雲龍

臣眾等志心皈命天節官大聖南斗天樞
度厄文昌煉冤真君諸靈官

臣聞二氣密移亦有盛衰之理五行迭運曾
無消息之機念彼勞生豈無厄會真聖既司
於救度默黎宜竭於忱洵今某恐懼以飭躬
敬信而瞻像誓歸依於大道願受度於神休
謹依科式建立壇場備香花燈燭之儀歸命
天節官大聖南斗天樞度厄文昌煉冤真君
伏願常善救人庶潛消於災咎永懷濟世示
陰陽以休祥稽首歸依虔誠讚詠

臣眾等志心皈命大聖官南斗天機上生
監簿大理真君諸靈官

臣聞真仙作德恥一物而不知聖道應時為
羣心之妙用降衷立命受氣賦形春掌握於
生成敢恭虔而請禱今某齋心向道精意瞻

天仰思長育之恩敢備祈禳之禮謹依科式
建立星壇備香花燈燭之儀志心皈命大聖
官南斗天機上生監簿大理真君伏願體乾
坤之生德以運化權使性命之委和咸歸有
道稽首歸依虔誠讚詠

南斗上生為天之梁幹運造化出入應時
職在文籍鬼神莫窺大虛寥廓大理之司
自根本委順無虧萬劫長存久視不移
普天司命上昇大微
南斗延壽燈儀